

Di sier Vincenzo Capello provedador di l'armada fo letere, date sopra Cataro. Come andava di longo verso Corphù. Scrive zerecha biscoti si provedi; et quelli è stà mandà, è tristi.

Di Verona, fo leto una letera, di 15, scrive uno amico di sier Francesco Foscari el cavalier, savio dil Consejo. Come el Chariati è lì e fa ogni cossa per haver danari, à posto che il formento si compri da lui a soldi 29 el minal, chi vol far pan per vender, che in piazza val soldi 22, e posto tara su a' calzolari e altri; sichè quelli è disperati per le angarie li hanno. Et come il Curzense si aspetava, qual va a Roma; poi torneria a Verona, e li faria la residentia come governador e locotenente de l'Imperio in Italia. *Item*, una nova, qual per avanti se intese, che il marchexe di Ancisa recomandato a l'Imperador, volendo aver certa abazia e far suo fiol abate, qual era a li soi confini, dicendo è soa juridition, el marchexe di Monferà, ch'è con Franza, era andato con zente a campo Anzisa, et presa la terra, amazato il marchese e squartato il fiol volea dita abazia, et la mojer dil marchese e fiole menate con lui presone in Casal San Gervaso; e questo fece *lizet* li agenti di Cesare, ch'è a Milan, li mandasse a protestar etc. *Item*, scrive esser venute letere di l'Imperador, che tutte le intrade ecclesiastiche de' venetiani siano tolte et messe in la camera fischal, et *de cætero* non si dagi il possesso ad alcuno, sia chi se voja, di alcun beneficio auto dal Papa senza expresso ordine e letera di Sua Majestà.

Fu posto, per li consieri, salvoconduto in la persona *tantum* a sier Beneto Baffo qu. sier Lorenzo per uno anno, el qual è XL criminal. Ave 34 di no, 110 de si; e fu preso.

Fu posto, per li savii, che tutte le provision date a' stratioti e altri sia di niun valor si le non saranno prese in Pregadi; le qual comenzi dal zorno le sarà stà prese: ave 7 di no, 128 de si.

Fu posto, per sier Alvise Bon e sier Alvise Foscari provedadori di comun, certa parte di panni di 100 et di 80 certi ordeni, *ut in ea*. Ave 7 di no, 64 di si, 11 non sincere.

262^{*} Fu posto, per li savii, atento fusse preso che fino a di 23 di Avosto tutti quelli pagano decime si dovesseno haver dato in nota sotto pena ai X savii, *ut in parte*, e perchè il termine fu breve, ch'el sia prorogato ditto termine fino per tutto Septembrio proximo. Presa; 5 di no.

Fu posto, per li diti, atento sier Hironimo da ca' da Pexaro sia stato provedador zeneral in Treviso senza alcun salario et rimasto consier di Venexia,

atento al presente non importa più il suo star lì, che li sia concesso licentia di venir a repatriar e intrar consier. Ava le dita parte 22 di no, 148 de si, e fu presa.

Fu posto, per li diti e savii ai ordeni, atento il gropo che dete sier Zuan Contarini patron a Baruto in la Procuratia sia stà tolto per la Signoria, e atento el ditto voy andar al suo viazo, ch'el sia preso che di ogni danar che vengi a li Camerlengi sia tolto il predito gropo, zoè ducati 700, e portadi a la Procuratia, acciò ditto sier Zuane possi pagar li homeni di la sua galia et expedirsi. Fu presa: 9 di no.

Fu posto, per li ditti, una parte, che *de cætero* non si possi meter parte di dar danari di la Signoria ad alcun, ni a quelli son debitori suspender, ni far permutation di danari etc., *ut in parte*, se la parte non sarà posta per 4 consieri, do Cai di XL, 4 savii dil Consejo, tre di teraferma, et l'habi i tre quarti dil Consejo congregato da numero..... in suso, *ut in parte*. Fu presa: 32 di no, 125 di si.

Fu posto, per li diti savii dil Collegio, certa parte; di dar a domino Baldisera Scipion di conduta fanti 1000, e *pro nunc* 300, e a suo fiol cavali 50 lizieri, *ut in parte*. Et sier Zuan Trivixan el consier non lassò fosse balotada, atento non era stà leta in Colegio al tempo lui era intrà consier; sichè non andò.

Fu posto, per li ditti, che li galioti non possano vender i loro formazi, condurano de qui, se non per do mexi poi zonti, *ut in parte*. Sier Polo Valaresso, è di Pregadi, qu. sier Gabriel, andò in renga e contradise, dicendo non se dia far questo a' galioti; avemo un bon populo angarizado etc.; sichè non andò la parte.

Fu posto, per li savii tutti, che sier Tomà Moro capitano dil Golfo, qual à servito la Signoria soto Maran et desidera repatriar, che li sia dato licentia, e sia preso che *de presenti* far si debbi per scurtinio uno capitano di l'armata menuta in Quarner con ducati 10 per spexe al mexe, di qual non sia obligato mostrar alcun conto, *ut in parte*; et fu presa: 25 di no, 118 di si. Et fato el scurtinio, tolti numero 28, rimase sier Anzolo Guoro di sier Hironimo, fo provedador a Feltre, qu. sier Hironimo 76. Soto, sier Vincenzo Zentani, el Cao di XL, di sier Zuanne 76; sier Lodovico Querini, el XL, qu. sier Giacomo 76; sier Francesco Pasqualigo, fo sopraconito, qu. sier Vettor 75; sier Nadal Marzelo, fo soracomito, qu. sier Nicolò 73, et altri non posono; il scurtinio sarà qui avanti.